

Cart Egwchope De'en Bzoj San Pabən' par Beṇə' Corinto Ca'

Pabən' chzoje' beṇə' ca' chso'onlilažə' Cristən' Corinton'

¹⁻² Nada' Pab naca' apostol che Jesocristən' con can' gwnalažə' Diozən'. Nada' chzoja' cart nga par le'e bagwlej Diozən' niçh chdopə chžagle cho'ela'ole Cristən' lao' syoda Corinton', na' notə'ətezəchle bagwlej Diozən' par nacle lažə' ne'enə', le'e nitə'əle doxen gan' mbane Acayan'. Nada' len beṇə' bišə'əcho Temtion' chonto' orasyon chṇabto' lao Xacho Diozən' na' Xancho Jesocristən' əsa'aclenšgue' le'e na' so'one' ca so cuezle binlo len xbab de'en yo'o lo'o yichjla'ažda'olen'.

De'e ca' gwdi' gwxaquə' Pabən'

³ Cheyalə' socho güe'ela'ocho Xacho Diozən'. Le' naque' Xa Xancho Jesocristən' na' Xancho Jesocristən' leczə cho'elaogüe'e le'. Xacho Diozən' cheyašə' cheži'ilaže'e chio'o na' le'enə' cheyonxenlaže'e chio'o šə bi de'en chac checho.

⁴ Ca naquə nada' ža, le'enə' cheyonxenlaže'e nada' catə' chyi' chzaca'a par niçh leczə chac cheyonxenlaža'a beṇə' yoblə catə' chəsə'əyi' chəsə'əzaque'e. Na' can' chon Diozən' cheyonxenlaže'e nada' leczə can' cheyonxenlaža'a beṇə'.

⁵ Lechgualē chyī' chzaca'a can' gwđi' gwxaquə' Cristən', pero na' con zoczə Diozən' cheyonxenlažə'əchgüē' nada' chedə' chonlilažə'a Cristən'.

⁶ Chyi' chzaca'a laogüē de'en chzejni'ida' le'e can' gonle par žjəyezole len Diozən'. Chac chia' ca' par nič cheyonxenlažə'a le'e len bi de'en chyī' chzaquə'əle. Na' de'en cheyonxenlažə' Diozən' nada' catə' bin' chac chia', chone' ca' par nič nada' cheyonxenlažə'a le'e. De'e na'anə' chonlilažə'əle Cristən' na' chgo'o chchejlažə'əle catə'an chyī' chzaquə'əle can' chyī' chzaca'a nada'.

⁷ Na' zotezə zoa' chbeza' de que le'e co'o gwchejlažə'əle catə' saquə'əzi'ile. Nezda' de que con can' chyī' chzaca'anə' leczə can' chyī' chzaquə'əle, na' can' cheyonxenlažə' Diozən' nada', leczə can' cheyonxenlažə'e le'e.

⁸ Beṇə' bišə', che'enda' əṇezele catequən' gwxaquə'əzi' gwxaquə'əyaša'a catə'an gwzoa' Asian' xte cuičczə bi goquə gona', con beyož bedolažə'a na' xte bžinczə catə' bena' xbab la' gatcza'anə'.

⁹ De'e li bena' xbab lo'o yichjla'ažda'ogua'anə' de que la' gatcza'anə'. Pero na' goc chia' ca' par nič cui bena' xbab de que gwzoiczəda' nadə'əza' yocuiža'a de'en chyī' chzaca'anə'. Na' de'en goc ca' benən par nič chonlilažə'əcha' Diozən', Dioz ben' yosban beṇə' guat ca'.

¹⁰ Na' catə'an bena' xbab la' gatcza'anə', Diozən' bosle' nada' par cui gota'. Na' nechoslacze' nada'. Na' con bazocza' lez chbeza' yosle' nada' šə bazezocla' cho'a yelə' gotən'.

¹¹ Yosle' nada' chedə' lenczə le'e chaclenle nada' chonle orasyonṇə' laogüē'enə' chṇabelene' yosle' nada'. Na' beṇə' zan naccho choncho orasyon

lao Diozən' par niĉ gaquəlene' nada'. Na' te gaquəlene' nada', yoguə'əlołcho güe'echo yelə' choxcwlen ĉhe Diozən' de'en bagoclene' nada'.

Pabən' gwžeine' šeje' Corinton'

12 Nezdā' lo'o yiĉhĵla'aždaogua'anə' de que chona' güen len yoguə'əloł benə' na' mazəchlə chona' güen len le'e. De'e na'anə' cho'a dižə' de que do yiĉhĵ do laža'a chona' güen len yoguə'əloł benə' ĉhedə' Diozən' babeyone' la'ažda'ogua'anə' xi'ilažə'. Bito chona' con can' na xbab ĉhia'anə', sino chona' can' na Diozən' por yelə' ĉaĉlen ĉhe'enə'.

13 Cart quinga chzoja' le'e, bito cheyalə' gonle xbab šə naquəchlə zejen sino can' nyojən nan' šejni'ilen. Na' zoa' lez šejni'ilen.

14 Baĉhgacžə chejni'ile de que do yiĉhĵ do laža'a chona' yoguə'əloł de'en chona', na' che'enda' šejni'ilen binlo. Na' catə'an əžin ža yidə Xancho Jeso'osən' de'e yoblə, che'enda' yebeile de'en babe'elena' le'e xtiže'enə', ca nada' chebeida' de'en chejle'ele ĉhei.

15 Na' zoa' segor šejni'ile de que do yiĉhĵ do laža'an chona' bitə'ətezə de'en chona'. De'e na'anə' gwzelaža'a yida' de'e yoblə delaņa'a le'e par niĉ gaquəlenĉa' le'e.

16 Gwzelaža'a tia' əgwlaņa'a le'e catə'an gwyā'a Masedonian' de'e yoblə, na' catə' beza'a Masedonian', leczə gwzelaža'a yedia' əgwlaņa'a le'e. Na' go'onda' le'e gaquəlenle nada' par yeya'a Jodean'.

17 De'e liiczə go'onda' yedia' əgwlaņa'a le'e. Bito chaca' šayeĉhə šayen can' ĉhsa'ac benə' ca' cui zjənombia' Diozən', to əņia' gona' to de'e gona' na'

to ə̃nia' cui gona'an. Lechguale de'e chacda' catə' cui chac gona' can' bagwnia' gona'.

18 Diozən' chone' complir can' ne'enə'. Na' nezene' bito goca' šayečə šayen catə'ən gwnia' yida' de'e yoblə delana'a le'e la'anə'əczə cui bida'.

19 Nada' len Silbanon' na' Temtion' gwdixjue'ito' le'e xtižə' Jesocrist Xi'in Diozən'. Cristən' bito chaque' šayečə šayen. Syempr chone' complir can' ne'enə'.

20 Yoguə' de'en ben Diozən' lyebe gone', babsle'e Jesocristən' par bedəyene'en. De'e na'anə' nacho "Amen" catə'ən cho'ela'ocho Diozən' na' zejen de que nezecho chon Diozən' complir can' ne'enə'.

21 Baben Diozən' par nič le'e len nada' zotezə zocho chonlilažə'əcho Cristən'. Na' bagwleje' chio'o par nič choncho xšine'enə'.

22 Bsele'e Spirit che'enə' zon lo'o yichjla'ažda'ochon' par nič nachbia' naccho xi'ine' na' par nič ənezecho de que gwžin ža catə' gaquə lao na'acho de'en gonəch Diozən' chio'o.

23 Bito bida' Corinton' de'e yoblə delana'a le'e čhedə' beyejda' bitolə detila' le'e. Diozən' nezene' dižə' lin' cho'a ə̃nia' ca'. Šə chonlaza'a Diozən' gone' nada' castigw.

24 Le'e bazotezə zole chonlilažə'əle Cristən', bito nato' le'e de'e niczən' šejle'ele. Lete de'en chonto' len le'e, chaclento' le'e par nitə'əchle mbalaz.

2

1 Ca naquə bečhoglaža'a, bitolə bida' de'e yoblə delana'a le'e par nič cui gwdiləcha' le'e che de'e malən' chonlen', čhedə' bito go'onda' socho trist.

² La' ža'alə bida' dezoa' le'e trist notono nla' no so'on ca soa' mbalaz.

³ Le'e cheyalə' gonle par ničh soa' mbalaz. De'e na'anə' bzoja' cartən' gotə'yoida' le'e cuejyichje de'e malən' par ničh catə'an yida' de'e yoblə delana'a le'e cui soa' trist can' chonlen'. Bzoja' le'e chedə' nezda' de que yoguə'əle yebeile gonle ca soa' mbalaz.

⁴ Tristchgua zoa' catə' bzoja' cart de'en bselə'a na' chegüi'inchgüeida' lo'o yichjla'aždaogua'anə' xte gwcheža'. Bzoja' cartən' caguə par ničh sole trist sino par ničh ənezele de que nada' chacchgüeida' chele.

Cheyalə' yezi'ixencho che beŋə' ca' chso'on de'e malən'

⁵ De'e li gwzoo' trist can' ben tole, pero caguə nadə'əzan' gwzoo' trist, casi yoguə' le'e gwzole trist por ni che de'en ben be'enə'. Nia' casi yoguə'əle chedə' bito nezda' šə yoguə'əczle gwzole trist.

⁶ Ca naquə le'e gwyanle par bchoj yelə' goxia' chelen' benlene' castigw, əchnia' le'e bačh goc to ca'atə'ətə' gaque' castigw.

⁷ Bito cheyalə' gonchlene' castigon'. Cheyalə' yezi'ixenle che' na' güe'elene' yelə' chxenlažə' par ničh cui cuejyichje' Diozən' por ni che de'en zochgüe' trist.

⁸ Chneyoida' le'e legon par ničh ənezene' de que chaquele che'.

⁹ Bzoja' le'e par ənezda' šə gwzenagle chia' ca naquə yoguə'ələl de'en gwnia' gonle.

¹⁰ Na' ca naquə chezi'ixenle che be'enə', lencza' nada' chezi'ixena' che'. Na' šə bi de'en bene' len

nada', nezcze Cristən' de que babezi'ixena' che' chedə' che'enda' gaquəlena' le'e.

¹¹ Cheyalə' yezi'ixencho che' par niçh cui soi gwxiye'enə' chio'o par goncho bichlə de'e mal. Nezczechə ca naquən' chene'en əxoayaguən chio'o.

Pabən' go'onchgüeine' yežague' Titonə'

¹² Catə' bežina' Troas par chixjui'a dižə' güen dižə' cobə che Cristən', Xancho Diozən' bene' par niçh gwnitə' beṇə' gwse'enene' yoso'ozenague'en.

¹³ Pero benchgua' xbab che beṇə' bišə'əcho Titonə' de'en cui bežaga'ane' na'. De'e na'anə' bzeida' beṇə' bišə'əcho ca' dižə' nach beza'a beya'a Masedonian'.

Cristən' bebeje' chio'o xni'a de'e malən' par niçh chnabi'e chio'o

¹⁴ Choxcwlen Diozən' babebej Cristən' chio'o xni'a de'e malən' par niçh chnabi'e chio'o, na' ṇa'a ngodə'əcho txen len le'. Na' leczə chon Diozən' par niçh gatə'ətezə zocho na' gatə'ətezə chejcho choncho ca chsa'acbe'i beṇə' ca beṇə' güennə' naquə Cristən'.

¹⁵ Chebei Diozən' de'en choncho ca chsa'acbe'i beṇə' ca beṇə' güennə' naquə Cristən'. Balə beṇə' ca' babesyə'əchoj xni'a de'e malən' na' yebalə' bachəsə'əbiayi'.

¹⁶ Catə' choncho ca chsa'acbe'i beṇə' ca beṇə' güennə' naquə Cristən', beṇə' ca' cui chso'onlilažə'ene' chsa'acbe'ine' de que yesə'əbiayi'e. Pero na' beṇə' ca' chso'onlilažə' Cristən' chəsya'əbeine' de'en chlo'echo ca beṇə' güennə' naque'enə', chedə' bade yelə' mban chega'aque' zejlīcane na' yesyə'əžine' gan' zo Diozən'. ¿No chio'o chonlilažə'əcho Cristən'

zaquə'əcho par əgwlo'echo ca beṇə' güennə' naque'enə' ža'alə cui zo Diozən' chaclene' chio'o?

¹⁷ Nitə' beṇə' zan choso'oxoayague' chəsə'əše'e can' na xtižə' Diozən' parzə niçh beṇə' ca' choso'opeine' len xtižə'əga'aque'enə' choso'onežjue' lega'aque' mech. Nada' bito chona' ca'. Do laža'a zotezəcza' chyixjui'a xtižə' Diozən' çhedə' le'enə' bene' mendad chyixjui'an. Diozən' neze nle'ine' naquən' chona' chyixjui'a xtiže'enə', nada' ngoda'a txen len Cristən'.

3

De'e cobə de'en non Diozən' lyebe gone' par gaquəlene' beṇəchən'

¹ Chezonljale xbab de que cho'elao' cuina' ca dižə' de'en cho'a, pero caguə ca'anə'. Nezczele de que chona' xšin Diozən' do laža'a. Na' bito chonən byen goxa'a cart par niçh ənezele nac naca', na' nic chonən byen gwzojle cart de'e goxa'a catə' ša'a ga yoblə can' chonən byen len balə beṇə'.

² Lechgualə chacda' çhele. Nada' gwduxjue'ida' le'e dižə' güen dižə' cobə çhe Cristən' par bocobə yichjla'ažda'olen'. De'e na'anə' bito chyažjda' cart de'en na de que naca' beṇə' güen, la' yoguə' no zjənombia' le'e zjənezene' can' goquəlena' le'e par chonlilažə'əle Cristən'.

³ Catə'an be'elena' le'e xtižə' Cristən' benlilažə'əlene' na' bene' par niçh Spirit çhe Dioz ben' zo zejlicəne bocobən yichjla'ažda'olen'. Na' de'en nacia' babocobə yichjla'ažda'olen' zaquə'əchən cle ca to cart de'en nyoj le'e yiš na' cle ca lei çhe Diozən' de'en byoj le'e çhopə yej ta'a.

⁴ De'en chonlilažə'əle Cristən' nezda' de que le'enə' chaclene' nada' par chona' xšine'enə' can' chebei Diozən'.

⁵ Ca naquə nada' bito de cho'a əñia' de que to gwłazza' chona' xšin Diozən'. Bito gaquə əñia' ca', la' Dioz nan' zoe' chaclene' nada' na' chone' par niçh chac chona' xšine'enə'.

⁶ Dioz na'anə' babene' par niçh chac chyixjui'a can' naquə de'e cobə de'en none' lyebe gone' par gaquəlene' chio'o beṇaḥ. De'e cobən' de'en none' lyebe gone' bito naquən ca lei che'enə' de'en nyojən chzejni'in chio'o de que cuiayi'icho de'en cui choncho complir yoguə'əloj can' nannə'. Diozən' none' lyebe gon Spirit che'enə' yelə' mban zejlicane che notə'ətezcho gonlilažə'əchone'.

⁷ Catə' bzoj Diozən' lei che'enə' le'e yej ta'a ca' na' bnežjue'en de'e Moisezən', de'e zan de'e bene' par gosə'əneze beṇə' Izrael ca' catequən' zaquə' lei che'enə' de'en chzejni'in chio'o beṇaḥ de que cuiayi'icho. Na' de'e tant goctit cho'alao de'e Moisezən' xte bito goquə yesə'əgüia beṇə' Izrael ca' cho'alaogüe'enə'. Pero šo'olažə' bega'a yelə' chactit che cho'alaogüe'enə'.

⁸ Zaquə'əczə lein' pero na' zaquə'əch dižə' güen dižə' cobə che Cristən' de'en chyixjue'ida', la' notə'ətezcho chonlilažə'əchone', Spirit che Diozən' chonən yelə' mban zejlicane checho.

⁹ Diozən' blo'e de que zaquə'əczə lein' la'anə'əczə nan de que yoguə' chio'o beṇaḥ de xtolə'əcho de'en cui choncho complir can' nannə'. Pero zaquə'əch dižə' güen dižə' cobə che Cristən' chedə' la' notə'ətezcho chonlilažə'əchone', Diozən' none' chio'o beṇə' güen.

10 Na' na'a de'en babidə Cristən', zaquə'əchgua dižə' güen dižə' cobə che'enə', na' de'e na'anə' lein' bačh naquən ca to de'e cui bi zaquə'.

11 De'e te chei lein' la'aṇə'əczə naquən to de'e zaque'e. Pero ca naquə dižə' güen dižə' cobə che Cristən' caguə de'e te cheinə'. De'e na'anə' zaquə'əch dižə' güen dižə' cobə che'enə'.

12 Nada' nezdə' de que caguə de'e te chei dižə' güen dižə' cobə che Cristən'. De'e na'anə' cho'a dižə' chei clar.

13 Moizezən' bcuašə' cho'alaogüe'enə' len to lachə' ničh cui besə'əle'i beṇə' Izrael ca' nac goc bega'a yełə' chactit che cho'alaogüe'enə'. Nada' bito hcuaša'a dižə' güen dižə' cobə che Cristən', sino chyixjui'an ničh chəsə'əneze yoguə'əloł beṇə'.

14 Beṇə' Izrael ca' bito gwse'ejni'ine' de'en chebei Diozən' na' xte ža neža catə' choso'olabe' lei de'en bzoj de'e Moizezən', bito chse'ejni'ine' bi zejen. Con beṇə' ca' chso'onlilažə' Cristən' chse'ejni'ine' bi zejen, na' casi yoguə' beṇə' Izrael gwlaž chia' ca' bito chso'onlilaže'ene'.

15 De'e li xte ža neža yoguə' las catə' choso'olabe' lei de'en bzoj de'e Moizezən' bito chse'ejni'ine' bi zejen.

16 Pero catə'əch chzolao chso'onlilaže'e Xancho Cristən', cana'achən' chse'ejni'ine' bi zejen lei de'en bzoj de'e Moizezən'.

17 Na' ca naquə chio'o chonlilažə'əcho Xancho Cristən', zo Spirit che Diozən' lo'o yičhja'ažda'ochon' chaclenən chio'o par choncho can' chene'e Diozən'. Bitoch choncho xbab de que por ni che šə choncho de'en na lein' chebei Diozən' chio'o. Na' Spirit che Diozən' leczə naquən Spirit

che Xancho Cristən'.

¹⁸ Ca to spejw chlo'en cho'alao beṇə', ca'aczə dižə' güen dižə' cobə de'en chzejni'in che Xancho Cristən' chlo'in yoguə' chio'o chonlilažə'əchone' de que naque' le'ezelaogüe beṇə' zaque'e. Na' Spirit che Xancho Cristən' zon lo'o yichjla'aždao' chio'o chejni'icho dižə' güen dižə' cobə che'enə' chaclenən chio'o par nič zdach chaquəchcho beṇə' šao' beṇə' güen can' naquə Cristən'.

4

¹ Yelə' beṇə' güen che Diozən' gwleje' nada' par chyixjui'a dižə' güen dižə' cobə che Jesocristən'. Na' de'e na'anə' bito chjəxaquə'əlaža'a ca de'en chyixjui'an.

² Bitobi chona' de'e əgwcuša'a o de'e gaquəda' zto' par yesə'əneze beṇə'. Bito chxoayaga' beṇə', na' bito chzejni'ida' xtižə' Diozən' clelə. Nada' chsed chlo'ida' beṇə' xtižə' Diozən' tcho'a tšao' na' yoguə'əlole' zjənezene' lo'o yichjla'ažda'oga'aque'enə' de que cho'a dižə' li. Na' leczə neze nle'i Diozən' can' babena'.

³ Con beṇə' ca' bachəsə'əbiayi' por ni che de'en cui chso'onlilaže'ene' lega'acze' bito chse'ejni'ine' dižə' güen dižə' cobə che Jesocristən' de'en chyixjui'a.

⁴ Gwxiye' nan' chnabia'an lega'aque' na' chonən par nchol yichjla'ažda'oga'aque'enə'. De'e na'anə' bito cho'o be'eni'in lo'o yichjla'ažda'oga'aque'enə' la'anə'əczə chzenga'acda'ane' dižə' güen dižə' cobə che Cristən'. Le'enə' naque' le'ezelaogüe beṇə' zaque'e, na' naquə yichjla'aždaogüe'enə' cayanə'an naquə yichjla'aždao' Diozən' na' tozə can' chso'one'.

5 Bitobi dižə' cho'a par güe'elao' cuina'. Con chyixjui'a de que cheyalə' gwzenagcho che Xancho Jesocristən'. Na' nada' con zocza' par gaquəlena' le'e xte ga zelao saquə'əda' chedə' chacda' che Jeso'osən'.

6 Chyixjue'eto' dižə' güen dižə' cobə che Jesocristən' chedə' Dioz ben' ben par nič chatə' be'eni' yežlyo nga leczə le'enə' babene' par nič be'eni' che'enə' yo'on lo'o yichjla'ažda'ochon'. Na' de'e na'anə' ca naquə chio'o banombi'acho Jesocristən' nezecho de que Diozən' naque' le'ezelaogüe beṇə' zaque'e chedə' yichjla'aždao' Diozən' naquən cayanə'ən naquə yichjla'aždao' Jesocristən' na' tozə can' chso'one'.

Apostol ca' gwnitə'ətezə gwnite'e gwso'onlilažə'e Diozən'

7 Chio'o ni latə'əzə cui zaquə'əcho par chzejni'icho beṇə' che Cristən', pero Diozən' chaclene' chio'o par chzejni'iga'aquechone'en. De'e na'anə' chsa'acbe'i beṇə' de que por yelə' guac xen che Dioz nan' choncho de'en choncho, caguə por ni che de'e zaquə'əcho gonchonṇə'.

8 Na' ca naquə nada' syempr chyi' chzaca'a pero bito chbejyichja' xšine'enə'. Zan las catə' cuichczə chežellaža'a naclə gona', pero nezda' zo Diozən' chaclene' nada'.

9 Choso'olagzejə choso'olagzidə beṇə' nada' pero Diozən' bito chbejyichje' nada'. Choso'ochi' choso'osaguə' beṇə' nada' pero bito choe' Diozən' latjə par so'ote' nada'.

10 Gatə'ətezə cha'a con do tyemp choso'ochi' choso'osaguə' beṇə' nada' na' chse'enene' so'ote' nada' can' gwso'ot beṇə' mal ca' Jeso'osən'. Diozən'

cho'e latjə chy'i chzaca'a yoguə' de'e quinga par nič nla'alaon de que zoczə Jeso'osən' chaclene' nada' par chona' can' chazlaže'enə'.

¹¹ Nada' žlac ne'e mbana' syempr chjti'a beṇə' choso'ochi' choso'osaque'e nada' laogüe de'en chse'enene' so'ote' nada'. Chəsə'əgue'ine' nada' čhedə' əchyixjui'a xtižə' Jeso'osən'. Na' la'aṇə'əczə chac ca' na' la'aṇə' chaṅə' cuerp čhia'anə' zoczə Jeso'osən' chaclene' nada' par chona' can' chazlaže'enə'.

¹² Gwžinlja ža so'ote' nada', pero caguə de'e bi de'enə', con la' bade yelə' mban zejlicane čhelen' de'en babzejni'ida' le'e xtižə' Diozən' na' banonen čhele.

¹³ De'e Dabin' bzoje' to Salmo gan' nan: "Čhonlilaža'a Diozən' na' de'e na'anə' cho'a dižə' čhe'." Can' benlilažə' de'e Dabin' Diozən', ca'aczən' čhonlilaža'ane' nada'. De'e na'anə' cho'a xtiže'enə'.

¹⁴ Diozən' bosbane' Xancho Jeso'osən' ladjo beṇə' guat ca'. Na' nezecho can' bosbane'ene'enə', leczə can' yosbane' chio'o na' yeyejcho gan' zoe'enə' par nič žjəyezochó txen len le'.

¹⁵ Yoguə'əloj de'en babžaglaogua', bžaglaogua'an par gaquəlena' le'e. De'e na'anə' bagwyanch chio'o čhonlilažə'əcho Xancho Jeso'osən', na' banaccho beṇə' zan cho'echo yelə' choxcwlen čhe Diozən' catequən' nži'ilaže'e chio'o.

¹⁶ Na' bito chjxaquə'əlaža'a ca de'en chyixjui'a xtižə' Xancho Jeso'osən' la'aṇə'əczə tža tža zda chaṅə' cuerp čhia'anə'. Tža tža čonəch Diozən' nada' fuers balor par yičjla'aždaogua'anə'.

¹⁷ Yob te čhe bitə'ətezə de'e dao' de'en čžaglaochó lao zocho yežlyo nga. Pero de'e ca'

chžaglaochon' chsa'aclenən chio'o nič socho probnid žjəyezochó mbalaz juisy len Diozən' zejlicane.

¹⁸ Chio'o bito chi' yichjcho che de'e ca' chle'icho yežlyo nga, chi' yichjcho che de'e ca' cui chle'icho. De'e ca' chle'icho zjəde yežlyo nga, de'e yesə'əde cheinə', pero de'e ca' cui chle'icho yežlyo nga caguə de'e yesə'əde cheinə', zjənaquən par zejlicane.

5

¹ Ca naquə cuerp chechon' gwxaquə'əleben ca to ranšzə. Žalnez te chei catə'an gatcho. Pero na' nezecho Diozən' gone' par nič žjəyezochó zejlicane yoban' gan' zoe'enə'. Na' gan' žjəyezochon' gwxaquə'əleben ca to yo'o gual chedə' naquən to de'e ben Diozən' na' caguə de'e te cheinə'.

² De'e li žlac nezoa' mbana' yežlyo nga chbežayaša'a lo'o la'aždaogua'anə' zelaža'a xte juisy goṅ Diozən' cuerp cob chia'anə' de'en gata' chia' yoban'.

³ Zelaža'a gata' cuerp cobə chia' sin cui gata' chedə' bito che'enda' soa' sin cuerp.

⁴ Cuerp chechon' de'e te chein'. De'e na'anə' chbežayaša'a lo'o la'aždaogua'an, caguə de'en che'enda' gata', pero de'en zelaža'a goṅ Diozən' cuerp cobə chian' de'en cui te chei na' žjəyzoa' len le' zejlicane.

⁵ Dioz na'anə' babocobe' yichjla'ažda'ochon' na' le'enə' babselē'e Spirit che'enə' zon lo'o yichjla'ažda'ochon' par nič ca' nezecho gwžin ža gone' chio'o to cuerp cobə de'en cui te chei.

⁶ De'e na'anə' yichjla'aždaogua'anə' zon mba bitə'ətezə chac. Nezda' žlac zoa' mbana' len cuerp

chia'anə', bito gaquə soa' yoban' gan' zo Xancho Jesocristən'.

⁷ Pero la'anə'əczə cui chle'ida' Xanchon' zocza' chonlilaža'anə'.

⁸ Na' yichjla'aždaogua'anə' zon mba de'en nezda' žjəyzoa' len Xancho Jesocristən' catə'an gata'. De'e na'anə' yejni'a gata' na' gožə' cuerp chia'anə' cle ca socha' yežlyo nga.

⁹ Na' žlac ne'e mbana' cho'elaža'a chona' ca chebei Diozən' nada' na' ca yebeine' nada' catə'an bagota'.

¹⁰ Chona' ca' čhedə' chonən byen yoguə'əcho techo lao Cristən' par əchogbi'en che to tocho segon naquən' bencho lao bguancho, šə bencho de'e güen o šə bencho de'e mal. Echogbi'en che to tocho šə socho mbalaz o šə si'icho castigw.

Notə'atezə beṇə' chso'onlilaža' Cristən' nite'e binlo len Diozən'

¹¹ Na' nada' ža ca naquən' nezda' de que cheyalə' əgwdecho cuent lao Cristən' che yoguə'əloj de'en chonchon', chona' xte ga zelao saquə'əda' par se'ejle'e beṇə' che xtiže'enə'. Diozən' nezene' de que chona' xšine'enə' do laža'a, na' leczə zoa' lez de que le'e banəzelen.

¹² De'e yoblə nia' de que bito cho'elao' cuina' sino che'enda' ənezele can' chona' nič yebeile na' güe'ele dižə' len beṇə' ca' chəsə'ənelao' chia' ye'ega'aclene' de que chona' xšin Diozən' do laža'a. Beṇə' ca' chəsə'ənelao' chia' chso'elao' cuinga'aque' por ni che šə bi de'en bazjənsede', na' che señyən' zjəzoe' na' che no lao dia chei gwsa'alje'. Na' bito bi nonən len lega'aque' nac zjənaquə yichjla'ažda'oga'aque'enə'.

13 Šə chaquele chac tonta'anə' por ni che can' babena', legon xbab de que par be'elaogua'a Dioz nan' babena' bi de'en babena'. Na' šə chonle xbab zo ša'oczə yichjla'aždaogua'anə', legon xbab de que par chaquəlena' le'enə' chona' bi de'en chona'.

14 Lechguale chaque Cristən' checho, na' de'e na'anə' bitobi chona' de'e bia'azəlaža'a. Chona' con can' chene'ene' chedə' bsanlažə' cuine' gwsə'ote'ene' por ni che yoguə' chio'o beṇach, na' de'e na'anə' guaquə əṇacho de que yoguə'əcho gotcho.

15 Por ni che yoguə' chio'o beṇachən' Cristən' bsanlažə' cuine' gwsə'ote'ene' par ničh bitoch goncho con de'e bia'azəlažə'əcho sino goncho can' chene'e le', chio'o bade yelə' mban zejlicane checho. Por ni che chio'on bsanlažə' cuin Cristən' gwsə'ote'ene' na' leczə por ni chechon' bebane' ladjo beṇə' guatən'.

16 Catə'an cuinə' gonlilaža'a Cristən' bena' xbab de que cui zaque'e, chedə' bena' xbab che' na' che yoguə'əte beṇə' de que zjəzaque'e segon nac zjənaque', na' nac chso'one', na' bi de'e de chəga'aque'. Pero na'a bitoch chona' xbabən' ca' che Cristən' o che notə'ətezəchlə beṇə'.

17 Chio'o bandil ngodə'əcho len Cristən' Diozən' babocobe' yichjla'ažda'ochon'. Na' bitoch chebeicho de'e ca' bebeicho antslə, na' leczə bitoch choncho can' bencho antslə. Bazochə ca beṇə' cobə, na' banža' yelə' chzo yelə' chbez chechon'.

18 Ca de'en banaccho ca beṇə' cobə, goc ca' chedə' Diozən' bocobe' yichjla'ažda'ochon'. Ben Diozən' par bezochə binlo len le' ca de'en bnežjw cuin Cristən' por ni checho. Na' Diozən' no'e chia'

chaquælena' beṇə' par niḥ yesyə'anite'e binḷo len le'.

¹⁹ Diozən' bsi'e xṇeze ben Cristən' par niḥ notə'atezə beṇə' chso'onḷilažə' le' chasyə'anite'e binḷo len Diozən', na' bitoch chone' cuent che de'e mal ca' bagwso'one'. Na' de'e na'anə' noe' Diozən' chia' chyixjue'ida' beṇəchən' naquən' so'one' par yesyə'anite'e binḷo len le'.

²⁰ Cristən' bsele'e nada' ca lgüe'e, na' Diozən' chone' par niḥ chṇeyoida' le'e ca cuinczə Cristən', le'e cuiṇə' gonḷilažə'əlene', par yezole binḷo len Diozən'. De'e na'anə' leyenitə' binḷo len le'.

²¹ Cristən' bitobi de'e mal bene', pero par niḥ cui si'icho castigw che de'e mal chechon' de'en choncho, Diozən' bene' par niḥ Cristən' gwxaquə'əzi'e caczə ṇacho lele'en bene' de'e malən'. Na' laogüe de'en gwxaquə'əzi' Cristən' lgua'a chio'o, Diozən' banone' chio'o beṇə' güen can' naquə cuine' chio'o chonḷilažə'əcho Cristən'.

6

¹ Nada' chona' xšin Diozən' txen len le'. De'e na'anə' chṇeyoida' le'e legon can' chazlažə' Diozən' par niḥ gachia' de que chaclenən le'e ca de'en chonḷilažə'əle Diozən' ben' nži'ilažə' le'e.

² Nyoj can' gwna Diozən':

Catə' bžin tyemp de'en bžia' bia' gona', bzenaga' chio'.

Na' catə' bžin ža bena'an, cana'achən' goquælena' le'.

Can' nyojən. Na' ža ṇeža babžin tyempən' gwne' ca', la' ža ṇeža zocze' par yebeje' le'e xni'a de'e malən' le'e cuiṇə' gonḷilažə'əlene'.

³ Bito chona' de'e əgwžon par niç beṇə' cui so'onlilaže'e Criston' niç ca' cui nono nelao' che xšin Diozən' de'en chona'.

⁴ Lgua'a de'e gona' ca', bitə'ətezə de'e chona' chona'an ca chsa'acbe'i beṇə' de que chona' can' cheyalə' so'on beṇə' güen xšin Diozən'. Chgo'o chchejlaža'a catə' choso'ochi' choso'osaquə' beṇə' nada' na' catə' chzaquə'əzi' chzaquə'əyaša'a, na' catə' za'ac bichlə de'e mal len nada'.

⁵ Leczə chgo'o chchejlaža'a catə' chjəti'a beṇə' chəsə'əyin nada', na' catə' chəsə'əyixjue' nada' ližya, na' catə' chəsə'əbiadi'e nada' chəsə'əne' de que naca' beṇə' mal, na' catə' chjxaquə'əda' por ni che yoguə'əloł de'en chona', na' catə' chžaglaogua' chbeja' yel bišgal, na' catə' chbil chdona'. Yoguə' de'e quinga chjti'a pero chgo'o chchejlaža'a.

⁶ Chona' ca chsa'acbe'i beṇə' de que chona' can' cheyalə' so'on beṇə' güen xšin Diozən'. Chlo'a de que bito bi de'e mal da' əchen yichjla'aždaogua'anə'. Chlo'a de que chejni'ida' can' chene'ene' goncho, napa' yelə' chxenlažə' len beṇə' yoblə, chona' güen len beṇə' yoblə, chona' can' na Spirit che Diozən', na' do laža'a chacda' che beṇə' yoblə.

⁷ Cho'a xtiže'enə' de'en naquə de'e li, na' de'en baben Diozən' par niç naca' beṇə' güen laogüe'enə' de'e na'anə' chone' nada' yelə' guac che'enə' par chona' xšine'enə' na' par chdiləlena' gwxiye'enə'.

⁸ Chona' ca chsa'acbe'i beṇə' de que chona' can' cheyalə' so'on beṇə' güen xšin Diozən' la'aṇə'əczə šə chso'elaogüe'e nada' o šə chəsə'əgue'ine' nada' na' la'aṇə'əczə šə chəsə'əṇe' güen chia' o šə chəsə'əṇe' mal chia'. Dižə' de'en cho'a naquən

de'e li, la'anə'əczə nitə beṇə' chəsə'əne' naca' beṇə' goxoayag.

⁹ Na' la'anə'əczə nitə beṇə' chsa'aque'ne' bito bselə' Diozən' nada', le'e nezele de que Diozən' bselə'e nada' naca' apostol. Zan las chona' xbab gatca'anə', pero nembana'. Ca de'en chon Diozən' par chac chia' yoguə' de'e quinga chžaglaogua', chone' ca' par niçh gaquəcha' beṇə' güen, caguə chone' par niçh gata'anə'.

¹⁰ La'anə'əczə de'e zan de'e chac par soa' trist, syempr chebeida' lo'o la'aždaogua'anə'. La'anə'əczə nga'an yaša'a, chona' ca beṇə' zan nite'e mbalaz. La'anə'əczə bito bi de chia', Diozən' chone' bitə'ətezə de'en chyažjda'.

¹¹ Con yoguə' dižə' de'en nezda' na' de'en naquə güen babi'an len le'e beṇə' Corinto de'en chacchgüeida' chele.

¹² Na' ca naquən' cui zole binlo len nada', naquən por ni che de'en cuitec chaquele chia', caguə de'en cui chacda' chele.

¹³ Chatə'əyoichgüeida' le'e can' chatə'əyoida' no xi'ina' leso legaque chia' can' chacchgüeida' chele.

Spirit che Diozən' zon lo'o yichjla'aždao' beṇə' chso'onlilažə' le'

¹⁴ Bito cheyalə' əgwcodə' ljuežjcho len beṇə' cui chso'onlilažə' Cristən'. Ben' zda licha bito gaquə gone' txen len ben' chon de'e mal. Na' ben' yo'o be'eni' che Diozən' lo'o yichjla'aždaogüe'enə' bito naquə yichjla'aždaogüe'en tozə len yichjla'aždao' ben' cui yo'o be'eni' che Diozən'.

¹⁵ Cristən' bito chac gone' txen len de'e gwxiye'enə'. Na' ben' chonlilažə' Cristən' bito

cheyalə' gaque' txen len ben' cui chonlilažə' Cristən'.

¹⁶ Na' chio'o cho'ela'ocho Dioz ben' zo zejlicane bito gaquə goncho txen len bitə'ətezə de'en naquə che lgua'a lsaquə' de'en chse'ejni'alažə' beṇə', chedə' Spirit che Diozən' zon lo'o yichjla'ažda'ochon' ca beṇə' zo liže'. Chac can' gwna Diozən':

Soa' len lega'aque' na' talenga'aca'ane'.

Gaca' ben' so'elaogüe'e, na' lega'aque' əsa'aque' xi'ina'.

¹⁷ De'e na'anə' cheyalə' goncho can' gwna Xancho Diozən':

Le'e yechoj entr beṇə' ca' cui chso'elao' nada' na' bitoch gonle txen len lega'aque'.

Bitoch gonle de'e malən'.

Legon par nič yebeida' le'e.

¹⁸ Na' nada' gaca' Xale na' le'e gacle xi'ina'.

Can' na' Dioz ben' napə le'ezelaogüe yelə' guac xennə'.

7

¹ Beṇə' bišə'adaogua'a, nezecho gon Diozən' len chio'o can' na lyebe quinga de'en babi'a dižə' chei. De'e na'anə' cheyalə' cuejyichjcho cuich goncho bitə'ətezə de'e mal na' bitə'ətezə xbab mal de'en choncho, par nič cui bi de'e mal ta' əchen cuerp chechon' o yichjla'ažda'ochon'. Na' ca de'en napcho Diozən' respet, cheyalə' gwzenaguəchcho che' par nič yichjla'ažda'ochon' šejəch gaquəchən xi'ilažə'.

Beṇə' Corinto ca' gosə'əbejyichje' de'e malən'

² Na' chneyoida' le'e, legaue chia' can' chacda' chele. Ni to beṇə' cui bi bi chonda'ane'. Bito bi

bi chona' par əgwɔɪɲjən yichjla'aždao' beɲə' yoblə.
Bito chɔoayaga' beɲə'.

³ La'anə'əczə ballə nale de que chona' ca', bito chdila' le'e. Bagwnia'acza' antslə lechgualə chacda' chele. Chacda' chele na'a mbana' na' leczə xte ža yelə' gota' ne'e guaquəczəda' chele.

⁴ Lechgualə chebeida' le'e na' zoa' segor gonle can' chene'e Diozən'. Babeyacxenlaža'a de'en bla' rson ca güennə' chonle, na' zochgua' mbalaz, la'anə'əczə de'e zan de'e chy' chzaca'a.

⁵ Catə' bežina' Masedonian' de'e li bito gotə' latjə yezi'ilaža'a. Do tyempte bosu'ochi' bosu'osakuə' beɲə' ca' nada', na' bžeba' lo'o yichjla'aždaogua'anə' godca' nac gonle.

⁶ Pero Diozən' syempr cheyonxenlaže'e beɲə' nitə' trist. Le' beyonxenlaže'e nada' de'en bela' Titonə'.

⁷ Beyacxenlaža'a caguə de'en bele'e na'azən' sino por ni che rson de'en zeno'enə' de que bebeichgüeine' can' chonle. Be'e dižə' de que zelažə'əchgualə yida' de'e yoblə delana'a le'e. Na' leczə ne' de que chegüi'inchgüeile lo'o yichjla'ažda'olen' ca naquə de'e mal de'en benlen' na' chi' yichjle gonle can' gwnia' le'e. Na' bebeichgüeida' de'en bele'enə' pero mazəchlə bebeida' dižə' de'en be'e chele.

⁸⁻⁹ Chacbe'ida' tristən' bzoa' le'e ca de'en gwnia' le'e le'e cartən'. Gwdechlə beyejda' ca naquən' bzoa' le'e tristən', pero na'a bitoch cheyejda' chedə' šložən' gwzole trist. Caguə chebeidan' bosgüi'inda' yichjla'ažda'olen'. Con chebeida' de que lao zole chegüi'inlažə'əle lo'o yichjla'ažda'olenə' bedinjele de'e mal chele de'en benle. Na' chebei Diozən' de

que bedin̄jelen. Can' naquən bitobi de'e mal benən len le'e de'en bzoja' le'e cartən', sino goclenən le'e.

¹⁰ Chebei Diozən' catə' notə'ətezə benə' zo trist chedin̄jene' che de'e malən' babene', na' Diozən' chezi'ixene' che ben' chedin̄je xtolē'enə' par nič cui yeyeje' lao yi' gabilən'. Na' šə babedin̄jecho xtolə'əcho ca' cuat socho trist de'en bedin̄jechon. Benə' zan ža' yežlyo nga bito chesyə'adin̄jene' xtolə'əga'aque'enə' catə' nite'e trist, na' de'e na'anə' gwžin ža žjəya'aque' lao yi' gabilən'.

¹¹ Chebei Diozən' can' bedin̄jele xtolə'əlen' catə'an gwzole trist. Na' de'en gwzole trist, lechgualē gone'ele benle can' chene'e Diozən' gonle, na' lechgualē gone'ele nezda' de que bito benle txen len ben' ben de'e malən', na' bža'ale por ni che de'e malən' ben be'enə', na' bžeble chaquele šə yida' yedeyena' le'e castigw. Lechgualē gone'ele gonle ca yebeida'. Lechgualē gwche' yichjle gonle can' na Diozən'. Na' leczə de'en gwzole trist benən par nič bnežjwle castigw che ben' ben de'e malən'. Na' lao yoguə'əlōl de'e quinga bagoc, naquən clar de que bitoch bi xtolə'əle de.

¹² Bito bzoja' le'e parzə nič ben' ben de'e malən' si'e castigw, nique n̄acho parzə nič ben' goquə de'e mal chei yeyacxenlaže'e. Leczə bzoja' le'e par nič lao Diozən' gocbe'ile de que ne'e chaquele chia' na' ne'e chene'ele gonle can' nia'anə'.

¹³ Na' babeyacxenlaža'a de'en bzenagle chia'.

Na' bebeichgüeida' chedə' benle ca bebei Titonə'. Yoguə'əle benle ca zoe' mbalaz.

¹⁴ Be'elaogua'a le'e catə' bi'a dižə' len Titonə' na' benle can' goža' Titon' gonle. De'e na'anə' bito chacda' tolə. Yoguə'əlōl de'en bagwnia' le'e

babi'a dižə' li, na' leczə catə'an bi'a dižə' len Titonə' be'elaogua'a le'e benle par nič nachbia' bi'a dižə' li.

15 Na' chaquəchene' chele chedə' chone' xbab can' yoguə' le'e bzenagle che' na' chone' xbab can' gwche'echgua yichje par benle can' gože' le'e.

16 Na' chebeida' zoa' segor gonle yoguə'əlol can' cheyalə' gonle.

8

Besə'əzanene' de'en gotə' chega'aque' par gwsa'aclene' beṇə'yoblə

1 Beṇə' bišə', chene'eto' ənezele can' bagoclen Diozən' tcuen tcuen beṇə' ca' chəsə'ədopə chəsə'əžag chso'elaogüe'e Cristən' gan' mbane Masedonian'.

2 Lao yelə' yašə' yelə' zi' chega'aque'enə' bagoclen Diozən' lega'aque' par nite'e mbalaz. Na' la'anə'əczə bazjənaquəchgüe' beṇə' yašə', besyə'əbeine' bosə'ənežjue' de'en besə'əyažje beṇə' chso'elao' Cristən' Jodean'.

3 Nezdə' na' cho'a dižə' de que to toe' bosə'onežjochgüe' de'e besə'əyažje beṇə' ca' la'anə'əczə cui bi gotə' par cuinga'aque', na' con xbab chega'aque'enə' gwso'one' ca'.

4 Gosə'əneyoine' nada' gua'a latjə yoso'onežjue' mech par əsa'aclene' beṇə' Jodea ca' bagwlej Diozən' par zjənaque' lažə' ne'enə'.

5 Na' gwso'onche' mazəchlə can' bena' xbab so'one' de'en gwso'on cuinga'aque' lažə' na' Xancho Cristən' na' lažə' na'anə' chedə' gwsa'acbe'ine' can' chene'e Diozən' so'one'. Na' leczə bosə'onežjue' mechən'.

6 Nezecho de que Titon' bide' gan' zole na' btipe' lažə'əle par btoble mechən'. Na' catə' gwnežda' de'en gwso'on beṇə' Masedonia ca', gotə'əyoida' Titonə' yeyede' yeto gan' zolen' par nič gaquəlene' le'e yeyož əgwtohle mechən'.

7 Güenchguan' chonle ca de'en lechgualē chonlilažə'əle Cristən', na' cho'echgualē xtiže'enə', na' de'e zan de'e chejni'ile che Diozən', na' chonle xšine'enə' do yičj do lažə'əle, na' chacchgüeile četo'. Na' de'e na'anə' chneyoida' le'e gonšgacze güen əgwtohle de'e scha'o par əgwnežjwle beṇə' Jodea ca'.

8 Bito chona' mendad əgwnežjwle mechən', con babi'a dižə' len le'e can' bosonežjo beṇə' mech. Na' šə gonle can' gwso'on lega'aque' gwlo'ele de que do lažə'əlen' chaquēle che Diozən'.

9 Nezele de que Xancho Jesocristən' nape' yelə' gwnabia' na' yelə' bala'an xen. Pero de'en nži'ilaže'e chio'o bzanene' gwlejyichje' yelə' gwnabia' na' yelə' bala'an che'enə' par nič bedəyene' ca si'icho yelə' bala'an xen.

10 Godgüize gone'ele gaquəlenle beṇə' yašə' ca' na' gwzolaoh toble mechən'. Na' na'a chnia' le'e de que naquən güen yeyož əgwtohlen.

11 Na' gwnežjwle de'en de chele xte ga zelao saque'ele par nič yeyož gonle can' gone'ele gonle.

12 Šə to beṇə' chene'ene' əgwnežjue' to de'e əgwnežjue', gobeicze Diozən' can' gone'enə' la'anə'əczə latə'əzə de'en gaquə əgwnežjue', pero na' šə cui bi de che' bito əna Diozən' cheyalə' əgwnežjue' de'e cui de che'.

13 Bito nia' de que gonle ca cuich bi bi yega'an chele na' gatə' che beṇə' yoblə.

14 Con che'enda' gatə' de'e chyažje yoguə'əle. Na'a de che le'e, na' cheyalə' gaquəlene' lega'aque' chəsə'əyažjene' na'a. Chexa šə gwžin tyemp catə' gatə' che lega'aque' na' le'e əyažjele, lega'aque' cheyalə' sa'aclene' le'e par ničh gatə' de'e chyažje yoguə'əle.

15 Nach gaquə can' nyoj Xtižə' Diozən', nan: "Ben' betobə de'e scha'o bito gotə'əch mazəchlə ca de'en byažjene', na' ben' betobə latə' da'ozən' gotə' che' de'en byažjene'."

Titon' na' beṇə' ljuēžje' ca'

16 Choxcwlen Diozən' bene' par ničh Titonə' che'enchgüeine' gaquəlene' le'e ca'aczən' che'enda' nada' gaquəlena' le'e.

17 Catə' gotə'əyoida'ane' yeyede' gan' zolen' par gaquəlene' le'e, le' gwne' ya'o, caguə de'en gotə'əyoida'ane' na'azə sino de'en bache'enchgüeiczene' yeyede' gan' zolen' par gaquəlene' le'e.

18 Chselə'a yeto beṇə' bišə'əcho len Titonə'. Na' tcuen tcuen beṇə' ca' chəsə'ədopə chəsə'əžag chso'elaogüe'e Jesocristən' chso'e dižə' güen che beṇə' bišə'əchonə' catequən' xoche chzejni'ine' beṇə' ca naquə dižə' güen dižə' cobə che Jesocristən'.

19 Nachən' bagosə'əbeje'ene' par sa'alene' nada' catə' žjəyesana' mechən' de'en chtobcho par gaquəlencho beṇə' bišə'əcho yašə' ca' nitə' Jodean'. Chtobchon par ničh Xancho Diozən' chzi'e yelə'

bala'aṅ na' par niḥ nla'alaō de que chene'echo gaqualencho beṅə' chyažj chchine.

²⁰⁻²¹ Yo'o yiḥja' gona' de'en naquə güen lao Xancho Diozən' na' lao beṅachən'. De'e na'anə' le' sa'alene' nada' par niḥ notono əna de que bito chona' can' cheyaḷə' gona' len mech xen de'en goxa'anə'.

²² Na' leczə len Titon' chselə'əto' yeto beṅə' bišə'əcho. Zan las bable'ito' de que do yiḥj do laže'e chone' xšin Diozən'. Nezene' de que le'e lechguale chene'ele gonle can' cheyaḷə' gonle, na' de'e na'anə' banachguan yide' gan' zolen' par gaquəlene' le'e.

²³ Šə no nabe le'e bixchen' za' Titon' na' beṅə' bišə'əcho ca' yeḥopə, leye'ega'aque' de que Titon' chone' txen len nada' chonto' xšin Diozən' par chalciento' le'e. Na' beṅə' ca' yeḥopə ža, tcuen tcuen beṅə' ca' chəsə'ədopə chəsə'əžag chso'elaogüe'e Cristən' chəsə'əsele'e lega'aque' par sa'aclene' le'e, na' chso'one' ca' chzi' Cristən' yeḷə' bala'aṅ.

²⁴ Na'a ža chṅeyoida' le'e legon güen len lega'aque' par niḥ yesə'əneze tcuen tcuen beṅə' ca' chəsə'ədopə chəsə'əžag chso'elaogüe'e Cristən' de que chaquele che Diozən'. Na' legon par niḥ la'alaon de que dižə' lin' gwnia' catə'an be'elaogua'a le'e.

9

Boso'otobe' mech par gwsa'aclene' beṅə' ca' chso'onližə' Cristən' Jodean'

¹ Bito chonən byen gwzoja' le'e de que cheyalə' əgwnežjwle mech par gaquəlenlə beṇə' Jodea ca' bagwlej Diozən' par zjənaque' lažə' ne'enə',

² chedə' nezda' de que le'e chene'ele gaquəlenga'aclene'. Cho'elaogua'a le'e cho'a dižə' len beṇə' Masedonia ca' chapəga'aca'ane' de que le'e beṇə' Acaya gone'ele gaquəlenlə beṇə' yašə' ca' godgüize na' gwzolao btoble mechən'. Na' de'en beṇle ca' do yichj do lažə'əle leczə zan beṇə' Masedonian' chse'enene' sa'aclene' lega'aque'.

³ Na' na'a chselə'a beṇə' bišə'əcho ca' gan' zolen' na' sa'aclene' le'e yeyož əgwtohlen par niç ca' sole probnid əgwnežjwlen. Che'enda' la'alaon de que dižə' lin' bi'a be'elaogua'a le'e de que gaquəlenlə beṇə' yašə' ca'.

⁴ ¿Chexa šə əsa'aclə to chopə beṇə' Masedonian' catə' yeyeda' gan' zolen'? Šə bito ne'e yeyož əgwtohle mechən' catə' yeyeda', gaquəda' zto' de'en gožəga'aca'ane' ca' güennə' gonle na' leczə le'e gaquele zto' de'en cui beṇle complir de'en gwzolao beṇle.

⁵ De'e na'anə' zencuialaogua' beṇə' bišə'əcho ca' šonə zeya'aque' gan' nitə'əlenə' chedə' chacda' chonən byen sa'aclene' le'e yeyož əgwtohle mech de'en beṇle lyebe əgwtohle par gaquəlenlə beṇə' yašə' ca'. Legwtobən antslə cuiṇə' yeyeda' par niç baden catə' yeyeda', na' gacbia' de que gonlen do yichj do lažə'əle caguə gonlen la fuers.

⁶ Ben' chaz latə'əzə, latə'əzə chelape', na' ben' chaz de'e scha'o, de'e scha'o chelape'. Ca'aczən' chac len chio'o, šə zanecho de'e scha'o par gaquəlencho beṇə', nachən' socho mbalaz juisy.

7 To tole cheyalə' əgwnežjwle ja'aquə'ətə' de'e yebeile əgwnežjwle chedə' lechgualē chebei Diozən' ben' chebeine' chnežjue' de'e chnežjue' par xšin Diozən'. Bito cheyalə' əgwnežjwcho de'e əgwnežjwcho la fuers sino əgwnežjwchon do lažə'ačo.

8 Diozən' nape' yelə' guac par chaclenchgüe' chio'o len bitə'ətezə de'e chyažjecho. Na' chac gone' ca gatə' yoguə'əlol de'e chyažjecho do tyempte par nič gaquə əgwnežjwcho bi de'e chyažje beṇə' yoblə na' goncho bichlə de'en naquə güen.

9 Nyoj Xtižə' Diozən' can' ben to beṇə' nan:
Bagoclene' beṇə' zan, bnežjue' de'e besə'əyažje
beṇə' yašə'.

Na' cuat ganlažə' Diozən' de'e güenṇə' de'en ben be'enə'.

10 Diozən' chone' par nič chatə' no xoa' biṇ na' bitə'ətezačhlə de'en chazcho, na' le'enə' chone' par nič chatə' de'e che'ej de'e chaocho. Le'egatezə ca' le'enə' gone' ca gatə' bichlə de'e chyažjecho na' gone ca čha'o xenchən par nič šejəch gonchcho de'e güenṇə'.

11 Na' bitə'ətezə de'en chac čele Diozən' chone' par nič chebeile chnežjwle de'e sčha'o de'e čəsə'əyažje beṇə' yoblə na' catə' neto' žjənežjoto' beṇə' yašə' ca' de'en babtoble, nach əso'e yelə' choxcwlen čhe Diozən'.

12 Na' catə' chio'o chnežjwcho de'e čəsə'əyažje yeziquə'əchlə beṇə' bagwlej Diozən' par zjənaque' lažə' ne'enə' chaclenga'acchone' par nič chatə' de'en čəsə'əyažjene', na' leczə ca' choncho par nič beṇə' ca' chaclencho chso'echgüe' yelə' choxcwlen čhe Diozən'.

13 Na' catə' yeyož əgwtoḅle de'e s̄cha'o de'en əgwnežjwcho beḅə' yašə' ca' əgwlo'en de que do yichj do lažə'əle chzenagle che dižə' güen dižə' cobə che Cristən'. Na' catə' beḅə' yašə' ca' yesə'əzi'e de'en əgwnežjwle lega'aque' nach əso'elaogüe'e Diozən' can' chselə'əle de'e s̄cha'o mech de'e gaquəlenən lega'aque' na' əso'elaogüe'e Diozən' can' chaclenle notə'ətezəchlə beḅə' chso'elao' Cristən'.

14 Na' so'one' orasyon par yesə'əḅabe' yelə' chaclen che Diozən' par le'e na' əsa'aque'ne' chele yesyə'əbeine' can' bagocwlenchgua Diozən' le'e len xbab de'en yo'o lo'o yichjla'ažda'olen' par ničh chnežjwle de'en chəsə'əyažje beḅə' yoblə.

15 Choxcwlen Diozən' ca naquə' goclen xen de'en bene' len chio'o beḅəch catə'ən bsele'e Xi'ine'enə' por ni checho. Bito de dižə' de'e güe'echo catec zaquə'ən de'en bsele'ene'.

10

Yelə' chnabia' che Pabən' de'en naque' apostol

1 Na' ca naca' nada' Pab de yeto de'e ḅia' le'e can' gonle. Chəsə'əna beḅə' de que nada' chžeba' par bi gona' o par bi ḅia' le'e catə'ən zoa' len le'e na' con catə' zoa' zitə' chzoja' le'e ca beḅə' cui chžeb. Bito naquən ca' sino chona' len le'e can' bentezə ben Cristən' len beḅə' lao yelə' chxenlažə' che'enə' na' yelə' beḅə' gačjwlažə' che'enə'.

2 De'e na'anə' chḅeyoida' le'e legon ca cui gonən byen tila' le'e catə'ən yida'. Bangüia' tila' beḅə' ca' chəsə'əne' chona' con can' na xbab chia'anə'.

3 La'anə'əczə' naca' beḅəch bito chona' con can' na xbab chia'anə' ca de'en chonchgua' xte ga zelao

saquə'əda' par ničh beṇə' yoblə yoso'ozenague' che Cristən'.

⁴ Nezdə' de que bitə'ətezə de'en chac chon cuinza' bito chaclenən nada' par gona' ca yoso'ozenag beṇə' che Cristən'. Pero Diozən' chaclene' nada' par chzoa' ca'alə bi de'en chžon par ničh beṇə' yoso'ozenague' che Cristən'.

⁵ Na' len yelə' chnabia' che' de'en babene' nada', chona' ca chəsə'əzexjwyichj beṇə' lao Cristən' par choso'ozenague' che' na' chso'one' xbab güen can' chene'e Cristən'. Chona' ca cuich chso'on cuinga'aque' xen sino chəsə'əbejyichje' bitə'ətezə de'en chžon par se'ejle'e dižə' li che Diozən'.

⁶ Chbeza' par ničh yoguə' le'e gwzenagle che Cristən' do yichj do lažə'əle, pero na' notə'ətezle šə cui gwzenagle, zoa' dispuest par gona' le'e castigw.

⁷ Legon xbab šə de'en chəsə'əna beṇə' naquən de'e li. Nitə' beṇə' chəsə'əne' zjənezene' bselə' Cristən' lega'aque'. Beṇə' ca' cheyalə' so'one' xbab de que leczə Cristən' bsele'e nada'.

⁸ Žalə' güe'echa' dižə' mazəchlə can' babi'an antslə ənia' de que Cristən' bsele'e nada' na' beṇe' yelə' chnabia' par bi de'en chona', guatə'əbia' de que cho'a dižə' li. Xancho Cristən' bsele'e nada' na' beṇe' nada' yelə' chnabia' par ničh gaquəlena' le'e, caguə par gona' ca cuejyichjle cuich gonlilažə'əlene'enə'.

⁹ Echnia' ca' par ničh cui gonle xbab de que chzoja' cart quinga par əgwšeba' le'enə'.

¹⁰ Beṇə' ca' chəsə'ənelao' chia' chəsə'əne' de que cart ca' chzoja' zjənaquən de'e žialao. Na' chəsə'əne' bito chžeba' bi ənia' le'e le'e cartən' pero bito cheyaxjda' par bi gona' catə' zoa' len le'e na' de que

xtiža'anə' bito bi zaquə'an.

11 Beṇə' ca' chəsə'əṇelao' chia' cheyalə' yesə'əṇezene' de que can' nia' le'e cart ca' de'en chzoja' le'e catə' zoa' zitə', leczə can' əṇia' na' leczə can' gona' catə'an soa' len le'e.

12 Bito che'enda' gonlebəda' beṇə' ca' chso'elao' cuinga'aque'. Beṇə' ca' chsa'aque'ne' de que chso'onyaṇe'e can' cheyalə' so'one' na' chsa'aque'ne' de que güenchguan' choso'osed choso'olo'ine' chedə' tozə can' choso'osed choso'olo'i yogue'e, len bito bi zaquə' de'en chso'one' xbabən' ca'.

13 Nada' bito güe'elao' cuina' əṇia' de que bena' bi de'e güen šə cui bena'an cuina'. Con gua'a dižə' che de'en babena' gan' babselə' Diozən' nada', na' nezdə' de que lenczə gan' zole na'anə' bselə'e nada'.

14 Na' ca naca' nada' babida' be'elena' le'e xtižə' Diozən' catə'an cui nonə' güe'elene'en le'e, de'e na'anə' naquəczən əṇia' le'e can' cheyalə' gonle.

15 Bito cho'a dižə' che xšin Diozən' de'en ben beṇə' yoblə ga cui bselə' Diozən' nada' par chixjui'a xtiže'enə'. Nada' zoa' lez de que le'e gonlilažə'əchle Cristən' na' catə' cuich chyažjele əggüia əgwyə' le'e, nach ša'acha' ga yoblə gan' əselə' Diozən' nada' par chixjui'a xtiže'enə'.

16 Na' chixjui'a dižə' güen dižə' cobə che Cristən' ga yoblə gan' cui no ne'e chixjue'en. Na' gua'a dižə' che xšin Diozən' de'en baben cuina' lgua'a güe'elao' cuina' che de'en baben beṇə' yoblə.

17 Bito cheyalə' güe'elao' cuincho sino cheyalə' güe'ela'ocho Xancho Diozən'.

18 La'aṇə'əczə šə əṇa to beṇə' de que chone' güen, caguə de'e na' šejle'echo de que le güennə' chone'.

Pero šə Diozən' güe'elaogüe'ene' nachən' ñezecho
be'enə' chone' güen.

11

*Pabən' na' beñə' ca' gwso'on cuinga'aque' ca
apostol*

¹ Žalə'əšga əgwzenagle yeto čopə dižə' de'en
əñia' le'e la'añə'əczə šə gaquele bito bi zjəzaquə'an.
Łegwzenag žlac əñia'an.

² Nada' bzejni'ida' le'e xtižə' Cristən' na' de'e
na'anə' che'enchgüeida' gaquele che tozə Cristən'
ca to no'ol güego' naplažə' cuine' na' chaquene' che
tozə ben' si' le'. Ca'aczən' chene'e Diozən' gaquele
che Cristən'.

³ Chxožda' yesə'əxoayag beñə' le'e par nič cuich
gonlilažə'əle Cristən' do lažə'əle na' cuich gaquele
che tozə le', can' bxoayag belən' de'e no'olə nechən'
ben' gwle Eb yelə' bia bib chebən'.

⁴ ¿Egüenchguan' chonle ža? Babla'ac beñə' gan'
zolen' choso'ozejni'ine' le'e che Jeso'osən' nža'alə
can' babzejni'ida' le'e. De'en choso'ozejni'ine'en
zdan clelə len dižə' güen dižə' cobə che Cristən'
de'en bagwyejle'ele chei. Pero le'e bito chaqule
zdebə chzenagle chega'aque'.

⁵ Malən' chonle banonle beñə' ca' ca apostol
chele na' chonga'aclene' xen. ¿Ecabi lecə zaca'a
nada' can' zjəzaque'enə'?

⁶ Ła'añə'əczə cui chac cho'a dižə' güenchgua,
chejni'ida' de'en cho'a dižə' chei. Bable'iczele
yoguə'əte de'en babena' na' ñezczele de que
chejni'ida' xtižə' Diozən' de'en cho'elena' le'e.

7 ¿Echaquele malən' bena' cui bi laxjua' gwxi'a catə'an be'elena' le'e dižə' güen dižə' cobə che Diozən'? Nada' ben cuina' ca to beṇə' cui bi zaquə' de'en cui bi laxjua' gwxi'a parzə niçh bena' ca zole mbalaz.

8 ¿Egwṇacho malən' bena' gwxi'a mech de'en gwso'on beṇə' ca' chəsə'ədopə chəsə'əžag chso'elaogüe'e Cristən' ga yoblə? Gwxi'an par niçh be'elena' le'e xtižə' Diozən' sin cui benle nada' mantener.

9 Catə' gwzoa' len le'e la'anə' cui gotə' de'en byažjda', bito gwṇabda'an le'e. Beṇə' bišə'əcho ca' zeya'ac Masedonian' lega'acle' gwso'onə' de'en cui gotə' chia'. Na' gwdapa' cuidad cui bi zed benda' le'e par gonle nada' mantener, na' batə'ətezəchlə bitoczə bi bi zed gonda' le'e.

10 Can' nezda' chaclen Cristən' nada' par cho'a dižə' li, ca'aczən' nezda' de que cuat gonda' le'e zed par gonle nada' mantener. Chebeida' guaquaṇia' de que bito bi gan chona' de'en chyixjui'a xtižə' Diozən' len le'e o len beṇə' ža' gatə'ətezəchlə gan' mbane Acayan'.

11 Caguə de'en cui chacda' chelen' cui gonczəda' le'e zed gonle nada' mantenerən'. Diozən' nezene' chacda' chele.

12 Goncha' can' choncza' cui bi laxjua' chzi'a par niçh beṇə' ca' chəsə'əna cui naca' apostol cuich yesə'əželene' bi yesə'əne' chia'.

13 Lega'aque' chse'enene' goncho xbab de que zjənaque' apostol, pero bito zjənaque'. Choso'osed choso'olo'ine' dižə' güenlažə' na' chəsə'əxoayague' par niçh chaquele de que Crist nan' əbsele'e lega'aque'.

14 Bito yebanecho de'en chəsə'əx̄oayague', chedə' la' ca'aczən' ch̄x̄oayag gwxiye'en chio'o par niç chaquecho de que de'en chene'en goncho naquən to de'e güen.

15 Na' de'en chon gwxiye'enə' ca', beṇə' ca' choso'ozenag chei leczə choso'oḫoayague' par niç gaquele de que choso'ozejni'ine' beṇə' de'en naquə de'e güen. Gwžin ža gon Diozən' par niç gatə' castigw chega'aque' segon de'e mal de'en chso'one'enə'.

De'en gwdi' gwxaquə' Pabən' de'en naque' apostol

16 De'e yoblə əchnia', bito gaquele de que chona' xbab de'e cui bi zaquə'. Le'e chzenagle che beṇə' ca' de'e liczə chso'on xbab de'e cui bi bi zaquə'. Ca'aczə legwzenag chia' žlac gonlebəda' lega'aque' gua'a to chopə dižə' che de'e güenṇə' de'en chona'.

17 Gua'a dižə'ən ca' la'aṇə'əczə nezda' Cristən' bito be'e dižə'ən ca'. Gona' ca' beṇə' chon xbab de'e cui zaque'e.

18 Beṇə' zan chso'e dižə' de que zjənaque' beṇə' güen por ni che can' zjənaque', o por ni che šə bi de'en bagwso'one' o bi de'en bagoc chega'aque'. Ca'aczən' nada' gua'a dižə' che cuina' chedə' zjəde de'en nac ca' de'e gua'a dižə' chei.

19 De'e tant non cuinle beṇə' sin' de'e na'aljan' chebeile chzenagle che beṇə' ca' chso'on xbab de'e cui bi zaque'e.

20 De'en chzenagle chega'aque' bazjənzoe' le'e xni'aga'aque'enə' ca esclabos chega'aque' Choso'oḫoayague' le'e par niç chnežjwle lega'aque' bi de'en de chele na' par niç chontezle bin' chəsə'əne'. Chso'elao' cuinga'aque' na'

chəsə'əbaže'e le'e par nič chzenagle čhega'aque',
na' le'e chebeile chonle can' chəsə'əne'enə'.

21 Gobeichljeile žalə' chonda' le'e can' chso'on
lega'aque'enə'.

Łeczə guaquəczə gua'a dižə' par əgwlo'ida' le'e
de que naca' beṇə' blao can' chso'on beṇə' ca',
la'anə'əczə šə gaquəle de que bito bi zaquə'an.

22 Chso'elao' cuinga'aque' de que gwsa'aljəlene'
beṇə' chso'e dižə' ebreo. Łeczə ca' nada' goljəlena'
beṇə' chso'e dižə' ebreo. Chso'elao' cuinga'aque'
de que zjənaque' beṇə' Izrael. Pero łeczə beṇə'
Izrael nada'. Chso'elao' cuinga'aque' de que
zjənaque' xi'in dia čhe de'e Abraannə'. Pero łeczə
xi'in dia čhe de'e Abraam na' nada'.

23 Chəsə'əne' de que Crist nan' bsele'e lega'aque'
par chso'one' xšine'enə'. Łeczə len' əbsele'e nada'.
Na' güe'ela'och cuina' can' chso'elao' cuin lega'aque'
nia' can' bagoc čhia'. Łechgualə babena' xšin
Diozən' mazəchlə ca' lega'aque'. Na' zan las bagota'a
ližya por ni čhe de'en əchyixjui'a xtižə' Cristən', na'
łeczə zan las bagosə'əyin jostis ca' nada'. Na' zan las
babelazə cui gota' por ni čhe de'e ca' bagoc čhia'.

24 Gueyə' las gosə'əyin beṇə' Izrael gwlaž čhia' ca'
nada' yid sot tğualjechoa las.

25 Šon las beṇə' jostis ca' gosə'əyine' nada' xis.
Na' yetlas boso'ošizə' beṇə' nada' yej xte yelatəzə
cui gwso'ote' nada'. Na' lao zya'a yež zitə' to lo'o
barcw, łeczə šon las bočinj nisda'on barcon' na'
cane bžina' yo biž. Na' lao šon lasən' beyinjənnə'
tši'i gwxxoa lao nisda'onə' tža tyel to lao yag.

26 Na' lao gwya'a jətiixjui'a xtižə' Cristən' zan las
bela' cui gota' o so'ot beṇə' nada'. Zan las goc zdebə
tia' yao ca', zo catə' goca' lao na' beṇə' bguan, na' zo

catə' beṇə Izrael gwlaž chia' ca' gwse'enene' so'ote' nada', na' lecəə zo catə' beṇə' cui zjənaquə beṇə' Izrael gwse'enene' so'ote' nada'. Na' yelatə'əzə cui gota' do syodan' na' do ga cui no beṇə' ža'. Na' bašə gata' lao nisdə'onə'. Na' do tyemp chxožda' cuiayi' xšin Diozən' por ni che beṇə' ca' chsa'aš chəsə'ane' de que zjəlene' chio'o pero caguə do lažə'əga'aque'enə'.

27 Na' lao bena' xšin Diozən' zan laš jxaquə'əchgüeida' na' zan las bguo'o bcheja' cui gwtasa'. Nombi'a yelə' chbil chdon chedə' zan las cui gotə' de'e ye'ej gaogua'. Na' zan las beyaga' cui gotə' xa' de'e byažjda'.

28 Na' de'e zanch de'e chyi' chzaca'a de'en cui cho'a dižə' chei. Pero mazəchlə chyi' chzaca'a, de'en chi'ichgua' yichja' yoguə' ža nac chac che le'e chdopə chžagle cho'ela'ole Cristən' to to yež.

29 Na' notə'ətezle catə' cui chzoile par gonyanə'əle can' chene'e Diozən', chzochgua' trist ca'aczə əṇacho nada'an cui chona'an. Le'egatezə ca' catə' beṇə' chəsə'əxope' le'e par chonle de'e mal, lechgualə de'e chacda' de'en che'enchgüeida' yebeja' le'e lao de'e malən'.

30 Chacda' chyažjele gua'a dižə' che cuina', na' de'e na'anə' güe'ešaza' dižə' che de'e ca' chəsə'əlo'e can' chac falt fuers balor chia', na' can' bito zaca'a bi gona' žalə' cui zo Diozən' len nada'.

31 Dioz ben' cheyalə' güe'ela'ocho zejlicane nezczene' cho'a dižə' li. Len' naque' Xa Xancho Jesocristən' na' Xancho Jesocristən' lecəə cho'elaogüe'e le'.

32 Na' catə'an gwzoa' Damascon' ben' goquə gob-erñador žlac gwnabia' Rei Aretas bnite'e beṇə'

gwsa'apə cho'a puert de'en zo le'e ze'e de'en nyechj syodan' par yesə'əzene' nada' catə' yechoja'.

³³ Pero beṇə' bišə'əcho ca' gosə'əgüe'e nada' to lo'o žomə soa na' bosyo'oletje' nada' le'e ze'e che syodan' cho'a to bentan par nič ca' cui gwsa'acbe'ine' par yesə'əzene' nada'.

12

Pabən' be'e dižə' che de'en ble'ida'ogüe'ene' na' de'en bzejni'i Jesocristən' le'

¹ Chonən byen gua'a dižə' che cuina' la'aṇə'əczə cui gaquəlenən nada'. Na' gua'a dižə' che balə de'en bable'idaogüe'eda' na' che balə de'en babzejni'i Xancho Jesocristən' nada'.

²⁻³ Goc žda' iz ben Diozən' par nič gwya'a yoban' na' nezdə' bžina' gan' zo'enə', na' bachonlilaža'a Cristən' ca orən'. Pero bito gocbe'ida' šə gwya'a do cuerp chia' o šə cui. Dioz na'azən' nezene' naquən' goquə.

⁴ Con nezdə' de que bžina' mer gan' zo Diozən' na' benda' chsoe' beṇə' ca' ža' na' dižə' de'e cui chsa'ac beṇəchən' yežlyo nga na' naquən dižə' de'en cui de lsens əgwzejni'ida' beṇə'.

⁵ Žalə' nan chia' güe'elao' cuina' güe'elao' cuina' de'en baben Diozən' len nada'. Pero con gua'a dižə' che de'e ca' choso'olo'e' can' bito zaca'a bi gona' žalə' cui zo Diozən' len nada'.

⁶ Žalə' gua'a dižə' ca mban' baben Diozən' len nada' catə'ən gwya'a yoban' naquən dižə' li, pero so'onlja beṇə' xbab de que naquəcha' beṇə' zaque'e mazəchlə can' naca'. Bito gue'echa' dižə' che de'enə' chedə' la' che'enda' yoguə' beṇə' so'one'

xbab chia' segon bin' chəsə'əle'ine' chona' na' segon can' chyixjui'a xtižə' Diozən'.

⁷ Diozən' bito chene'ene' gon cuina' xen por ni che de'e ca' ble'idaogüe'eda' na' de'e ca' bzejni'ine' nada' de'e cuiṇə' se'en yesə'əle'i yeziquə'əchlə beṇə'. De'e na'anə' bene' par niçh chžaglaogua' len to de'en chac che cuerp chia' nga. De'en chžaglaogua' len len gwxaquə'əleben caczə ga cha'a to yešə'. Na' lechgualē chon gwxiye'en ca gaquəda' tolə de'en chac chia' ca'. Dioz nan' chone' par niçh chac chia' ca' niçh cui gona' xbab de que lechgualē zaca'a.

⁸ Šon las gwṇabda' Xancho Cristən' gone' par niçh yega'a de'en chžaglaogua' len cuerp chi'anə'.

⁹ Nach Xancho'n' gwne': "Bito gona' ca cuich əžaglaogo'. Con sotezə soa' gaquəlena' le'. Lezən de'en chyažjdo'. Na' ca naquən' cui chac bi gono', nada' gaquəlena' le' len yelə' guac chia'anə'." Ca gože' nada'. De'e na'anə' chebeiləda' cho'a dižə' can' cui chac bi gona', chedə' de'en chac chia' ca' chlo'en ca yelə' guaquən' napə Cristən' par chac-lene' nada'.

¹⁰ De'en chonlilaž'a'a Cristən' chebeida' bitə'ətezə de'en chloe' can' chyažjda' yelə' chaclen che'enə'. Chebeida' catə' choso'ožia choso'onitə' beṇə' nada'. Chebeida' catə' chac falt bi de'en chyažjda'. Chebeida' catə' choso'olagzejə choso'olagzidə beṇə' nada'. Chebeida' catə' bichlə de'e chžaglaogua'. Chebeida' chedə' catə' chac chia' ca' chaclench Cristən' nada' len yelə' guac che'enə'.

Pabən' gwche'echgua yichje' beṇə' ca' chso'onlilažə' Cristən' Corinton'

11 Babenle byen bi'a dižə' che cuina' la'anə'əczə nezdə' bitotec bi zaquə'an güe'echo dižə'an ca'. Žalə' le'e cho'ele dižə' de que nada' naca' beṇə' zaque'e, bito benən byen bi'a dižə' quinga. Nezdə' bitobi zaca'a žalə' cui zo Diozən' len nada', pero lechguale zaquə'əcha' cle ca beṇə' ca' banonele apostol chele, beṇə' ca' chonle xen.

12 Diozən' bablo'e de que naca' doalje apostol che'enə'. Bagoclene' nada' bguo'o bchejlaža'a bena' xšine'enə' entr le'e la'anə'əczə de'e zan de'e bagoc chia'. Goclene' nada' bena' xšine'enə' len yelə' guac che'enə' na' lecə len yelə' guac che'enə' bena' miagr na' bichlə de'e zaquə' yesyə'əbane beṇə'.

13 Tozə ca güennə' bena' len le'e na' can' bena' len beṇə' ca' chəsə'ədopə chəsə'əžag chso'ela'ogüe'e Cristən' ga yoblə. ¿Echaquele bencha' güen len lega'aque' cle ca can' bena' len le'e de'en cui gwṇabda' le'e gonle nada' mantener? Lesi'ixen chia' šə malən' bena'.

14 Bazoa' probnid par yida' dezlaṇa'a le'e de'e gwyon lase. Na' catə' yida' bito gua'a latjə gonle nada' mantener. Bito che'enda' gonle nada' bi de'en de chele, che'enda' gon cuinle lažə' na' Cristən'. Bito naquən par bidao' ca' so'ombo' mantener xaxna'aga'acbo', sino xaxna'aga'acbo' nan' cheyalə' so'one' lega'acbo' mantener.

15 Ca'aczən' naquən len nada' ža, yebeida' əzanda' bitə'ətezə de'en de chia' na' lente cuina' par gaquəlencha' le'e gwzenagle che Cristən'. La'anə'əczə lechguale chacda' chele, pero nachle bitotec chaquele chia'.

16 Balle chṇelaole chia' nale de que chxoayaga' le'e de'en bito bi'a latjə gonle nada' mantener

parzə niç cuejalana' mechən' de'en chtoble par gaquəlenle beṇə' bišə'əcho ca' zjənaque' beṇə' yašə'.

17 ¿Ecabi nezele bito bxoayaga' le'e len notə'ətezə beṇə' babsela'a gan' zolen'?

18 Gwneyoida' Titon' bide' bedəlane'e le'e na' bseła'a beṇə' bišə'əchon' yeto len le'. ¿Ecabi nezele de que bito bxoayag Titon' le'e? Na'alje ¿əcabi tozə can' chona' len can' bene'enə'? Na' can' che'enda' gaquəlena' le'e ca'aczən' gone'ene'.

19 De repent chaquele cho'a dižə' quinga parzə niç le'e cui gonle xbab de que chona' bi de'e mal. Pero caguə ca'anə'. Nezda' ngoda'a txen len Cristən' na' de que Diozən' neze nle'ine' naquən' chona' na' bin' ənia'. De'e na'anə' cho'a dižə' quinga, beṇə' bišə' dao', par niç chaquəlena' le'e.

20 Chžeba' əželda' šə bi de'en cui chonle güen can' che'enda' gonle catə'an yida' gan' zolen', na' šə əželda' chonle de'e malən' bito šə'olažə'əle caṇ' gona' castigw chelen'. Chona' xbab, chexa šə chdilə chšašle na' chgue'i ljuežjle, o šə əchlōc ljuežjle na' chonle parzə niç gaquə güen che cuinzle. Na' chexa šə chnele mal che ljuežjle na' chexa šə nacle beṇə' goçitj dižə' o šə chon cuinle xen o šə ža'ale chac yazə.

21 Chžeba' de que catə'an yida' dezlaṇa'a le'e zanle cuinə' cuejyichjle ca de'en chgo'o xtole na' chbejyichjle be'en chele o no'ol chele par chzolenle beṇə' yoblə na' bitə'ətezəchlə yełə' zto' de'en chonle len cuerp chelen'. Na' Dioz chia'an gone' par niç yeto'ida' na' yegüi'inda' che nolen' cui gwlejyichjle de'e malən' chonle.

13

Pabən' gw̄dixjui'e de que gw̄nežjue' castigw che beṇə' ca' chso'on de'e malən', na' chguape' beṇə' Corinto ca' diox

¹ De'e gwyon̄ lase dezlaṇa'a le'e ṇa'a. Na' gaquə can' nyoj̄ Xtizə' Diozən' nan: “Catə' no gao xya che to beṇə' de que nape' dolə', choglaochon che' de que nape' dolə' šə yotilən ca yesə'əna chopə o šonə testigw beṇə' chso'e dižə' de que babene' de'e mal.”

² Bagoža' beṇə' ca' chso'on de'e malən' antslə catə'ən bedəlaṇa'a le'e de'e əgwchope de que bito yeyašə'ada' lega'aque' šə cui yesyə'ədinjene' xtolə'əga'aque'enə'. Na' de'e yoblə ṇa'a lao cuinə' yezida' gan' zolen' ṇia' notə'ətezəchlə bachonle de'e malən' bito yeyašə'ada' le'e catə'ən yida'.

³ Na' catə' gona' castigw che le'e cui chedinjele xtolə'əlen' cana'achən' ənezele de que de'en chnia' za'an che Cristən', can' nale chene'ele ənezele. Na' bito ṇacho de que Cristən' bito gaquə gone' castigw chelen', la' nape' yelə' guac xen, na' bablo'e yelə' guac che'enə' len le'e.

⁴ De'e li Cristən' ben cuine' ca beṇə' cui bi chac gon catə'ən gwso'ot beṇə' le' bosə'ode'ene' le'e yag corozən'. Pero zocze' ṇa'a chedə' Diozən' bosbane'ene' len yelə' guac che'enə'. Le'egatezə ca' naca' nada' ca beṇə' cui bi bi chac gon. Pero nezdə' ngoda'a txen len Cristən' na' catə'ən yezida' gan' zolen' gwlo'ida' le'e can' zo yelə' guac che Diozən' len nada'.

⁵ Legonyanə' xbab chele šə de'e liczə chonlilažə'əle Jesocristən'. Na' sə de'e li chonlilažə'əlene' gache'ile de que zoe' len le'e. Pero šə chache'ile

bito zoe' len le'e guacbe'iczele de que caguə chonlilažə'əlene'enə'.

⁶ Pero zoa' lez gacbe'ile de que zocze' len le'e par nič ca' gacbe'iteile de que naca' doalje apostol che'.

⁷ Chona' orasyon chnaba' gaquəlen Diozən' le'e par nič cuejyichje cuich gonle de'e malən'. Bitobi nonən len nada' šə gona' ca gacbe'ile de que bselə' Diozən' nada' o šə cui, con šə le'e sotezle gonle de'e güen.

⁸ La' šə chzenagle che dižə' li che Jesocristən' bito əyažjən gona' castigw chele. Con gwnežjua' castigw che beṇə' ca' cui choso'ozenag chei.

⁹ Chebeida' catə' le'e chonle de'e güen na' bito chyažjən gwlo'a yelə' chnabia' chia'anə' par gona' castigw chele, la' leczə chona' orasyon chnaba' gaquəlen Diozən' le'e par nič gonle xbabən' can' cheyalə' gonle de'e yoblə.

¹⁰ Babzoja' de'e quinga antslə ze'e yida' gan' zolenə' par nič yedinjele xtolə'əlen' na' cui gona' castigw chelen' catə'an yida'anə'. Diozən' bsele'e nada' naca' apostol che'enə' par nič gona' ca so'onlilažə'əch beṇə' le', caguə par gona' ca yesə'əbejyichje' cuich so'onlilaže'ene'.

¹¹ Na'a ža beṇə' bišə', babzoja' de'en go'onda' ənezele. Le'e gon xbab can' cheyalə' gonle de'e yoblə. Legwzenag consejw quinga chona' le'e. Legac tozə len ljuežjle. Leso binlo tole yetole. Dioz ben' chaque checho na' ben' chon par chzo chbezcho binlo len xbab de'en yo'o lo'o yichjla'ažda'ochon' sošgue' len le'e.

¹² Catə' chežagle leyolgüiž ljuežjle dižə' šao' par nič gacbia' de que chaque che ljuežjle.

¹³ Yoguə' beṇə' ca' nitə' nga beṇə' ca' bagwlej Diozən' par zjənaque' lažə' ne'enə' choso'oguape'e le'e diox.

¹⁴ Xancho Jesocristən' sotezə soe' gaquəlenšgue' le'e. Na' Diozən' gonšgue' par niç gacbe'ichele de que chaquene' çhele. Na' Spirit çhe Diozən' gonšgan par niç yoguə'əle gonle tozə xbab. De'e na'azən' əchnia' le'e. *Pab*

**Testament Cobə de'en choe' dižə' che ancho
Jesocristən'
New Testament in Zapotec, Yatzachi (MX:zav:Zapotec,
Yatzachi)**

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
d439ce34-67af-5db7-b82c-f44ad9932db2